



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**Name of School** : Baptist Lui Ming Choi Primary School

**學校名稱** : 浸信會呂明才小學

**Name of Play 劇名** : 媽媽是個太空人

**Script writer 劇作者** : 黃玉儀老師

**Synopsis 故事大綱 :**

家樂的媽媽是太空人，工作繁重的她連學校的親子戲劇表演也由傭人 Linda 代勞，因而家樂將不滿的情緒發洩在傭人身上。一天，埋怨媽媽的家樂認識了一位體恤媽媽的網友 Adam (Linda 的兒子)，大家都渴望媽媽能留在身邊。家樂透過網友介紹下，利用瞬間轉移進入自己的大腦意識，去尋找快樂的幻想 — 媽媽的關愛，究竟家樂會否以瞬間轉移獲得快樂和關愛？



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

## 第一場

地點：學校禮堂

王 sir: 各位觀眾，你哋好，歡迎嚟到我哋浸信會呂明才小學睇我哋的校慶親子戲劇演出，劇目係《星際奇遇記》！事不宜遲，馬上歡迎我哋嘅同學仔同埋佢哋嘅媽咪、媽咪啦！

（三對親子出場和觀眾揮手，其中一對是家樂和 Linda，家樂顯得極不情願。）

王 sir （扮漫步，指示家長們跟著）剛剛到太空，一切無重力，周圍好多行星……左邊係火星，右邊係木星，太空人，你哋準備好去探險未？

眾人 準備好喇！

港媽甲：（電話響起）Sorry 等等……喂，老細？report？……聽日有！王 Sir，唔好意思啊，我原來仲差份 report 未交，今日排唔到戲啦，阿囡呀，一陣 Maria 會嚟接你架喇，你哋排住先啦！（離開）

女兒 媽咪……

王 sir 吓？排排下走咗去，咁都得嘅？！Hey……唔緊要唔緊要，我哋繼續！大家睇下，左邊係火星，右邊係木星，太空人，你哋準備好去探險未？

港媽乙（電話響起）等等，喂，唔係咁馬？急 call 開會？！王 Sir，唔好意思啊，我要趕返公司，阿仔，你一陣完左自己返屋企啦！（離開）

兒子 媽媽……

王 sir 喂！下！我哋未正式排戲架……唉，走晒，點表演啊？算喇算喇！休息一陣先喇！

（Linda 站在家樂旁，給老師發現）

王 sir 家樂，成班家長之中你媽咪最好，冇遲到早走，排到最後。

家樂 王 Sir，校慶嗰日千祈唔好俾佢同我上台，如果唔係我實俾全校同學笑死！

王 Sir 家樂！乜你咁同媽咪講嘢架！

家樂 吓？佢點睇都唔似係我媽咪啦！

王 Sir 吓……咁佢係？

家樂 我工人。

Linda Hello，Sir，我來自德成。

王 sir Hi……咁你媽咪呢？

家樂 返工。

王 sir 咁佢下個月的校慶親子表演會唔會嚟架？

家樂 佢會架！

Linda Sorry Sir，Mum 尋日話下個月 Plan 咗要上火星，應該嚟唔到。

家樂 （驚訝）咩話？



**IMPORTANT NOTE** 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 王 sir            唉！明明話係親子戲劇表演，一定要家長陪同！真係過份，啲媽咪成日早走遲到都算啦，而家竟然搵個工人姐姐嚟代替媽咪，仲要話係因為自己要上火星？佢以為自己真係太空人啊？
- 家樂            我媽咪冇講大話，佢真係太空人嚟架！
- 王 Sir           吓？
- Linda           真架！我阿 Mum 真係太空人黎架！



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

## 第二場 太空的夢景

地點：家樂的睡房

（家樂從被窩中走出來，手上拿著太空火箭）

家樂 火箭升空！飛吖！飛吖！我哋下一個目的地係天狼星！（自問自答）「船長，請問我哋仲有幾耐先到天狼星架？」「唔...我估仲有成一光年咁耐！」「嘩！咁我哋要開 turbo 先得嘞！」「點解你要咁心急去天狼星呢？」（偷笑一下）「哈哈，呢一個係秘密！」  
「即刻出發！」（當他再走多一圈，音樂轉得夢幻）

（太空中出現很多小行星，由演員扮演，他們動作很慢，但有規律地轉動）

家樂 （興奮地）嘩，嘩，嘩……真係到咗嘞！呢邊係昴宿星喎！呢邊仲有仙女星！

（此時，家樂的媽媽著上太空衣出，和家樂揮手）

媽 家樂！

家樂 媽咪！

媽 （唱）願我會揸火箭

媽／家樂 （唱）帶你到天空去，在太空中兩人住

媽 家樂，我好掛住你吖。

家樂 我都係呀！

媽 點呀？我唔係度，你乖唔乖先？

家樂 你唔係度，我不知幾乖呀！

媽 （二人正想相擁，音樂突轉）吖！係黑洞吖！！

家樂 佢吸走我架飛船呀！救命吖！（他在自轉，整個星體的演員圍著他們在轉）

媽 家樂！保重！（媽媽被也黑洞捲走了）吖！

家樂 （大驚）媽咪！唔好走！俾返個媽咪我！！嗚……（醒來）吓？！原來係發夢，好彩啫！

（Linda 進場）

Linda 家樂！你無事嘛？

家樂 我有事，你出返去啦。

Linda Oh my god ！（誇張地）



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 家樂           What 's the matter ? （更誇張）
- Linda           你間房亂到好似打 typhoon 咁！（執地方）
- 家樂           你咪攪我啲模型呀！（二人爭持）
- Linda           俾我幫你執啦。
- （鈴聲響起，家樂媽在電話框中出現。）
- 家樂           媽咪！媽咪，我好掛住你啊，你又話上個月去完天狼星就會返屋企既？
- 媽              家樂，冇辦法啦，太空總署最近好忙，媽咪宜家要由天狼星直接去火星做嘢
- 家樂           吓？咁我學校個親子表演呢？你話 Linda 係代住你先，你會返嚟同我表演架啫。
- 媽              家樂…… 你乖，仲記唔記得媽媽教你首歌啊？……（唱）願我會揸火箭……
- 家樂           （唱）帶你到天空去……我記得啊！
- 媽              到時你同 Linda 一齊表演呢首歌，一定會好精彩。
- 家樂           我唔要！
- Linda           家樂，我會比心機練廣東話，一定唔會令你被人笑架。
- 家樂           我有媽咪陪已經會被人笑啦！
- 媽              我叫咗 Daddy 到時陪你去架喇。
- 家樂           Daddy 成日都唔得閒。你哋個個都掛住做嘢，無人理我！
- Linda           我成日都理你，係你唔俾我理。
- 家樂           我唔要你理啊！
- 媽              家樂！我同 Daddy 唔做嘢，邊個賺錢返嚟養你！邊有屋你住，有靚衫你著，有工人姐姐照顧你？
- 家樂           我先唔要 Linda 啊！
- 媽              你咪發少爺脾氣呀吓！媽咪要去做嘢啦，你就同 Linda 一齊表演，就咁決定啦。
- 家樂           哼！我黐死媽咪吖！
- Linda           家樂，你媽咪去咁遠做嘢都好辛苦……
- 家樂           佢係最出色嘅太空人，但佢都係最衰嘅媽咪！
- Linda           佢陪唔到你，佢都好難過架……
- 家樂           你好嘈啊，我知，你留你仔仔一個係印尼，你連自己仔仔都照顧唔好，我更加唔洗你照顧我啊！所有大人都係自私！你走！
- （Linda 無奈地離開。）



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

### 第三場 我有我方法

( 他的房響起叮一聲，他查看電話，舞台出現幾位小朋友，他們是家樂的網友。)

Adam 家樂

家樂 Adam

Adam 你今日好嗎？

家樂 Adam，我好慘吖！

網友一 你做咩唔開心吖？

家樂 我媽咪要去火星，學校親子表演，得工人姐姐同我表演，實俾同學笑死啦。

網友二 你媽咪都係想賺多啲錢，等你生活過得好啲啫。

網友三 唉！阿爸阿媽都唔知我哋想要啲咩嘅！大屋，但係我一個人住？大餐，但係得我一個人食？

家樂 係囉！仲要我成日對住個工人姐姐！

Adam 你好幸福呀，有大屋住，有大餐食，仲有工人照顧你。

家樂 Adam，你無嘅咩？

Adam 自從我媽媽去咗香港做嘢，我就係屋企嘅工人，幫手做家务同照顧埋阿婆。

家樂 乜你媽咪喺香港做嘢架？

Adam 係啊，佢要兩年後先返嚟。

眾網友 吓？兩年？

Adam 我媽媽係工人，佢要照顧人地家庭嘅小朋友，好辛苦，不過佢努力賺錢，我先有錢讀書，有錢買書包同校服，所以我好多謝媽媽。

家樂 做工人真係幾辛苦嘅……你咁細個就要自己照顧自己，真係慘啊……

Adam 我唔慘！我係印尼呢度有阿公阿婆同我一齊，周圍都係朋友，但媽媽就唔同，佢係香港要住陌生人屋企，又有朋友，有唔開心、唔舒服都要一個人面對……

家樂 (自言自語) Adam 都講得啱，離開屋企出去做嘢嘅媽咪真係好慘……

Adam 唉……原本佢話下個月打算請假返嚟見我，但……好似佢照顧嗰位小朋友最近唔開心，佢話要比心機同佢練習咩表演……啊……校慶親子表演，所以唔返嚟住。



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

家樂 (突然想起) 校慶親子表演？我學校？……Adam，你媽咪叫咩名啊？

Adam Linda。

(家樂十分驚訝，Linda 從另一邊出。)

Linda (拿著劇本在練習，在扮月球漫步) 願「餓…」…我……會搵火……箭，帶……你到……天空……去……唉，廣東話真係好難……(坐下，放下劇本，拿起相框) 唉，乖仔 Adam，媽媽好掛住你啊

家樂 Linda……

網友一 見你地都咁慘，等我幫下你地啦！你地有無聽過瞬間轉移嘅能力。

家樂 瞬間轉移？

網友二 我都有聽講過啊！即係無論你身處邊度，都可以即刻轉移去另一個地方，上太空都得！

網友三 但聽講呢個方法好危險架喎！

網友一 嘩！你發掘到呢種超能力先講啦！

網友二 係呀！大腦係混沌嘅意識時空，好多入咗去嘅人都出唔返嚟！

家樂 太好啦，我要試！

網友三 吓，家樂，好可能出唔返現實世界，咁危險你仲去？

家樂 係！既然媽咪係咁遠做嘢咁辛苦，等我去見媽咪，仲有，Adam，我要你帶你媽咪返去印尼見你！

Adam 家樂……

網友一 好！等我益下你！呢個網站最安全，你 Download 咗呢條 Link 之後就可以進入自己大腦。



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

## 第四場 告白

地點：家中

( Linda 十分害怕的在房中走來走來 )

Linda 弊嘞，弊嘞！點算！

媽 Linda，做咩事呀？太空總署好忙，你叫我趕番黎做乜呀！

Linda Mum……家樂唔知做咩……佢幾日無郁過……叫佢又唔醒……

媽 (上前檢查，看到電腦) 進入大腦程式？吓？佢將自己帶咗入自己大腦？

Linda 咁點解會唔郁架？

媽 大腦係一個好複雜嘅系統，有個混沌嘅意識時空，好易令人迷失，困住係入面出唔返嚟

Linda 家樂一定係困住咗係入面！

媽 (揸電腦) 佢 set 咗 password，要有 password 就可以入去佢個世界度搵佢。  
(媽媽試 password)

V.O. 密碼錯誤！如果忘記密碼，可以回答三條安全碼問題。第一條，家樂最喜愛的食物？

媽 意粉？

V.O. 錯

Linda 雞翼！（音效 bingo）

V.O. 第二條家樂最想做嘅事？

媽 打機！

V.O. 錯

Linda 去太空。（音效 bingo）

V.O. 最後一題，家樂最喜愛嘅人物？

媽 ……巴斯光年！

V.O. 錯！

Linda Mum！（中獎聲）

媽 原來我一啲都唔了解家樂，你，比我更了解我個仔……





**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- Linda 我成日都同家樂一齊嘛。我都好少見自己個仔，連佢鐘意做咩都唔係好知……
- 媽 Linda，多謝你花咁多時間俾家樂……今次我要為家樂做返少少嘢，等我入去啦，你喺度等我。
- Linda Yes，Mum……
- V.O. 現在可以進入家樂嘅大腦。大腦開啟！
- 媽 家樂！！（四處尋找）
- 意識 歡迎進入家樂的大腦，呢度係意識時空，充滿家樂嘅真實同幻想片段。
- 媽 你係邊個？
- 意識 我係意識管理員，製造回憶同幻想，控制家樂嘅意識。
- 媽 就係你令家樂出唔到嚟？
- 意識 係佢自願留係到！
- 媽 點會，家樂點會想留係呢個咁混亂嘅地方？
- 意識 呢度有佢實現唔到嘅快樂片段，佢留係度比係現實更開心。
- （虛擬世界的家樂和媽媽由另一演員扮演，音樂入）
- 虛家樂 1 媽咪，天上面個月亮好靚呀！你可唔可以摘佢俾我啊！
- 虛媽 1 好高喎！
- 虛家樂 1 你係太空人嚟架嘛。你坐火箭咪得囉。
- 虛媽 1 但係好遠喎，媽咪要去好耐先會返！
- 虛家樂 1 咁算啦，我唔要月亮啦，媽咪唔好走！
- 虛媽 1 雖然冇月亮，（從身後拿出星星）但係媽咪已經摘咗粒星星俾你。係你最鍾意嘅天狼星！
- 虛家樂 1： 嘩！多謝媽咪。
- （二人相擁，定格）
- （虛媽 2 和虛家樂 2 出）
- 虛家樂 2 媽咪，我今次作文有一百分呀！
- 虛媽 2 咁叻仔。老師叫你作咩題目嚟架？
- 虛家樂 2 題目係我的母親！
- 虛媽 2 咁讀俾媽咪聽啦。（家樂一邊行，一邊讀）
- 虛家樂 2 （興奮地）媽媽是個超人，常常在天空飛來飛去，維持宇宙太平，每當我望上天空，閃呀閃的星星，就是媽媽對着我微笑的訊號……



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

虛媽 2 家樂，你先係我星星，一直照耀我！

（二人定格）

（家樂出）

家樂 媽咪、媽咪！

媽 家樂！

（家樂沒有反應，意識拉住了媽，不讓她靠近家樂。）

家樂 （找著虛媽 1）媽咪，校慶表演我好緊張啊，

虛媽 1 唔洗擔心，家樂！

家樂 個個同學都好叻

虛媽 1 你都一樣好叻啊。

家樂 但係……我仲係好驚……（虛媽 1 突然靜止）

虛媽 2 （找著虛媽 2）你放心，媽咪嗰日同你一齊上台表演！

家樂 真嘅？！

虛媽 2 仲有 Daddy 同 Linda，都會一齊嚟睇我哋表演。

家樂 有媽咪陪住我上台，我就咩都唔驚啦！

（家樂露出燦爛的笑容，虛媽 2 突然靜止，家樂感到徬徨。）

媽 （想哭）我嘅家樂，媽咪冇好好陪係你身邊……對唔住……

意識 你睇佢幾開心，既然現實入面你唔可以帶到快樂俾佢，你唔好逼佢返出去啦！

媽 唔得！只要帶到家樂出去，我一定會好好陪佢！

（眾演員出來，他們拿出黑布，扮演黑洞的漩渦在轉）

媽 咩事啊？

意識 黑洞風暴啊！你每一次飛上空，家樂都好擔心你被黑洞吸走。所以係佢意識入面成日都會出現呢個黑洞。

（虛媽 1、2、虛家樂 1、2、家樂四處逃走，最後被捲走）

媽 （唱）願我會揸火箭，帶你到天空去，在太空中兩人住，活到一千歲 都一般心醉，有你在身邊多樂趣。

家樂 （凝望著媽）媽咪？

家樂 （悠悠轉醒）媽咪？我成功啦？我成功搵到瞬間轉移嘅能力，去到太空，見到你啦！

媽 家樂，原來你係想有瞬間轉移能力先會入嚟，呢度唔係太空，你仲係大腦入面。



**IMPORTANT NOTE** 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 家樂 下……我又係發夢？
- 媽 都唔係，係媽咪掛住你，嚟搵你啊。
- 家樂 真嘅？…… 咁見到你，我都算成功咗（開心，但忽然想起 Adam）但……有瞬間轉移，我咪唔可以帶 Linda 去見 Adam……
- 媽 （一笑）放心啦，媽咪出錢，買機票等佢地見面。
- 家樂 媽咪……
- 媽 媽咪仲會請假，校慶嗰日同你一齊表演。
- 家樂 媽咪，多謝你啊！



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

## 第五場 團聚

(王 sir 帶領著一對對親子出來，扮演在星際漫步，還有 Linda 和 Adam。)

王 Sir           各位家長，我哋宜家幻想吓自己係太空漫步。

Linda           Adam，太空……巧巧巧巧令！

Adam           巧多星星！

家樂           媽咪，太空係咪咁樣架？

媽               呢度比太空靚，因為太空少左一粒最大嘅星星

家樂           係天狼星？

媽               唔係，係你，你先係媽媽最閃亮嘅星星！

(音樂漸大)

全劇完